

Арқалықтың сері жігіті анықталды



Өткен аптада қалалық мәдениет сарайының ұйымдастыруымен «Жігіт сұлтаны – 2015» байқауы өткізілді. Онда оқу орындарының студенттері мен жас мамандар өзара бақ сынасып, бас жүлдеге таласты.

Ата салтын насихаттай отырып, нағыз қазақ жігітінің бойында қандай қасиеттер болу керектігін айғақтайтын бұл сайыста 7 үміткер қағысып, өз өнерлерін ортаға салды. «Жігітке жеті өнер де аз» демекші, қатысушылар киім үлгісі, өнерпаздығы, тапқырлығы, мергендігі мен жігерлілігі сарапқа салынды. Сайыста Арқалық қаласы әкімдігінің ішкі саясат бөлімінің басшысы Мәнсия Айтмағамбетова, «Нұр Отан» партиясы қалалық филиалынан Берік Габдуллин, Арқалық қалалық балалар мен жасөспірімдер спорт мектебі директорының орынбасары Мылтықбай Абдуантов және т.б. қазылық етті.

Сайыс төрт кезеңнен тұрды. Дәстүрлі таныстыру кезеңінде үміткерлер ұлттық киім үлгісін көрсетіп,



туралы мағлұмат берді. Өнер көрсету кезеңінде би, ән, күй орындалды. Тіпті, «естімеген елде көп» дегендей, жігіттердің ішінен шыны шайнап, көрерменді аңтаң қалдырған өнерпаз да болды. Циркте ғана тамашалайтын бірегей нөмірмен жұртшылықты таңқалдырған жігіт – Торғай аграрлық техникалық колледжінің оқушысы Сағдат Ералшев болды. Сонымен қатар, спорттық кезеңдер, атап айтқанда спорт ойыны

мен өгіз тартыс бәсекелері жігіттердің білек күші мен мергендігін сынап түсірді.

Жалпы, сайыс тартысты болғанына жұртшылық куә. Бас жүлдеге қос сайыскер – Торғай гуманитарлық колледжінің оқушысы Данияр Рысбеков пен Торғай аграрлық-техникалық колледжінің оқушысы Сағдат Ералшев таласты. Сайыстың орта тұсына дейін бір-біріне дес бермей, ұпай саны бойынша тең келді. Алайда, соңғы спорттық кезеңде,

яғни өгіз тартыстан Данияр Рысбеков көш ілгері болды. Нәтижесінде, қазылар алқасының шешімі бойынша, Данияр жеңімпаз атанып, «Жігіт сұлтаны» атағына ие болды.

Қатысушыларға ұйымдастырушылар бағалы сыйлықтар мен мақтау қағаздарын табыс етті. Бас жүлде иегері алдағы уақытта Арқалықтың намысын облыстық сайыста қорғамақ.

«АХ»